



Terenga 3: Hōtaka 27 - Whakataurite 4

He Mihi

Tēnā rā tātou i tō tātou ikapahitanga i tēnei papa o Ako. E wātea nei tēnei papa kia tauria e te tini ngerongerero. Kotahi anahe tana ture matua, me reo Māori te karawhiu. Nō reira, takahia mai.

Hei Mahi Whakarongo

He kaupapa mōrikarika kei roto i te kiriata poto hei whakarongo, hei mātaki hoki mā tātou ā kō ake nei. Anei ngā pātai hei whakautu mā koutou.

- 1) E hia ōrau ngā wāhine Māori ka patua e ā rātou tāne?
- 2) E taurite ana ngā tatauranga Māori me ō te iwi Pākehā?
- 3) He aha tētehi huarahi kua whakaritea hei aukati i ngā mahi tūkino rā?

He Whakamārama

Tēnā tirohia te tauria e whai ake nei:

'He tokomaha ake te Māori ka tūrorotia e te mahi tūkino, i te Pākehā.'

Ka whakamahia ngā kupu 'ake', 'atu', me 'iho' hei whakatauriterite, ā, ko te pū 'i' hei hoa whakataurite mō ēnei kupu. He ōrite te 'ake' me te 'atu', engari ka whakamahia te 'iho' mehemea e heke ana te kounga o te kupu āhua. Tirohia ngā tauria e whai ake nei

- He nui ake tēnā keke i tō upoko!
- He nui atu tō rātou whare i te whare o tōku whānau.
- He iti iho aku hū i ōna.
- He nui noa ake te taone o Tāmaki i te taone o Ruatāhuna.

I te tauria whakamutunga o runga ake nei, kua tāpirihia te kupu 'noa' i mua i te 'ake' hei whakakaha i te kupu āhua. nui ake = *bigger*; nui noa ake = *way bigger*

Hei Mahi

Hangaia he rerenga kōrero hei whakataurite i ngā kōrero nei.

1. kaikōrero reo Māori: 4%
kaikōrero reo Pākehā: 97.82%
2. mauhere wāhine Māori: 60%
mauhere wāhine Tauīwi: 40%
3. taupori Pākehā: 69%
taupori Māori: 14.6%
taupori Āhia: 9.2%
taupori Iwi nō ngā moutere: 6.9%

He Whakautu:

1. He nui noa ake ngā kaikōrero reo Pākehā i ngā kaikōrero reo Māori i tēnei whenua.
2. He iti iho ngā mauhere wāhine Tauīwi i ngā mauhere wāhine Māori.
3. He tokomaha noa ake ngā Pākehā i ngā Māori, i ngā tāngata nō Āhia me ngā iwi nō ngā moutere. / He tokoiti iho ngā iwi nō ngā moutere i ngā Māori, i ngā tāngata hoki nō Āhia.